

Neuzeuger Messerer - Rud

Rudenkirtag Sierning Faschingdienstag 4.3.2025



<p>d'Neuzeuger sågn im heutign Fäll Grüaß Gott zan dreißigstn Mål d'Leut zan Låcha bringa is net leicht und do'h net schwaa' ma braucht nur nåch freiem Wülln dö Regierung nåchispül'n åft dann waar, so is's belegt dö Låchparade scho perfekt</p>	<p>Ös gibt bald nimma weit und breit koa ausgeprägte Fåschingszeit wo anstandslos Må' und Frau ausglåssn lustig sei' kå' ma kennt dö Tag im Narr'ngwand van Normal nimma vanaund weil d'Politik dö spült uns schier s'ganze Joahr an Fåsching vür</p>
<p>Da Ruf und s'Prinznpoar va Håll san heut då mit'nand amål wolln vakündn ganz bestimmt da Fåschingsprinz übernimmt s'Buagamoastaamt dort weil da Ruf is ållweil fort treibt sein' Fåsching s'ganz Joahr gern åls Bundesråt drunt in Wien</p>	<p>d'Huemer Traudi måg nimma übergibt an die Regina dö übalåsst ihr Amt in Trauer da jungen Anna Ganglbauer åls Bezirksbåurin, ja mei' sollt' ma doh a Båurin sei' drum hát ihr da Våta Fred gshwind an Vierkanter hi'gstöllt</p>
<p>Åls Vizebuagamoasta koan Lenz håt da Göschl Karl Heinz weil d'Leut hålt goar so jammern wolln muaß er an zweitn Sprechtag håltn hoffantli bleibt nuh gnuu Zeit dass er in Wolfern drunt gscheit auf da Raika wohl scho' orndli' Geld zåhln kå'</p>	<p>d'Raika Sierning schaut bestimmt dass da Umsatz ållweil stimmt dass eah in da Kassawelt ja koa Cent net entgeht habn eahn obern Aufsichtsråt ön Stefan Landerl gråd ön da Pfarrkircha dö Zeit åls Zechprobst ei'teilt</p>
<p>Dö neuche Pfarre Steyrtål hát für zehn Pfarrn vier Priester gråd bleibt für jedn Ort drüber schwåch a hålber Pfarrer über da Karl Sperka wird dö Såcha mit sein' Radl nia damåcha brauchat Flügl auf da Stell(n) mia tatn eahm Red Bull empfehl'n</p>	<p>Ön Sepp und dö Gerlinde Hofer habn ma ön Wåldviertl troffa im Hotel am drittn Tåg bringt ban Fruahstuck er dö Klåg dass er narrisch Kreuzweh hát d'Miturlauber gebn den Råt dass d'Måtråtz'n dort im Bett zan Aufblåsn geht</p>
<p>Seniorenwandertåg, oh Gott ban Båchner gibt's a Krustnbrot drei Weiba habn sih ban Essn an da Rindn Zåhnd aus'bissn da Willi Mitterhuaba hát åls ålta Zahntechniker gråd dö drei Kåblzåhnd gschickt ön Pfuschn wieda einipickt</p>	<p>Ban Båchner habns seit vorign Joahr an jungan Hund, an schön sogoar der stühlt ban Nåchbar Wåssermå' a ålte Henn' oda an Håh' kimmt am Gschmåh, probiert's van Neu'n wann's so weita gang in Reih'n kunnt d'Martina ohne Scheitern s'Jausnsortiment erweitern</p>

<p>Da Eisnhuaba Ingrid, sollts wissn hât d'Kâtz den guatn Kuchn gfressn Kekserl hâts für d'Jaga bâcha da Hund frists hâlbe Blech nåcha trotz dem liadalichn Treibn solln d'Viecha doh am Lebn bleibn ba so a Tierliab, oh mei' kâ' s'Frauerl nur a Greane sei'</p>	<p>Da Ackerl Sepp fahrt nia allein mit ban Obstbauverein hât jeds Joahr wieda ållweil a neuche Freundin dabei im Winter baut der guate Må' dö ålte Freundin wieda å' dass im Fruahjoahr dann gråd a frische Schesn Plätz hât</p>
<p>d'Wolfinger Judith is zur Zeit a übergücklichs Weibaleut hât zan Sechzga åls Geschenk an foahrbarh Heahnaståll daglengt kâ' jetz bis ans Lebensend Bäurin sei' mit Fúaß und Händ kunnt womögli in Ehrn goar nuh Ortsbäurin werd'n</p>	<p>Da Pfisti Hannes, dös is wichtig mâcht dö Ruabnåbhol Logistik hât trotz bestn Ordnungswesn s'Soja Dreschn ganz vagessn doh der Einnahmeverlust hât eahm, hoff ma, net z'vül 'kost dass sih heut der guate Må' ön Gstanzlwei' nuh leistn kâ'</p>